

Penduduk Taman Tasik Bangi 3 kecewa masalah kolam takungan gagal diatasi

Bantu selesai masalah kami

Oleh **MOHD. ZULFADLI SHARIFUDIN**
kota@utusangroup.com.my

KAJANG 18 Sept. - "Berhenti menuding jari sesama sendiri. Sebaliknya mencari penyelesaian kepada masalah kami".

Itulah rasa kecewa yang diluahkan penduduk Taman Tasik Bangi 3, Seksyen 3, Bandar Baru Bangi dekat sini apabila pihak yang diharapkan dapat menyelesaikan masalah mereka seolah-olah bersikap lepas tangan dan menuding jari sesama sendiri.

Pada 12 Ogos lalu, *Utusan Malaysia* melaporkan mengenai kebimbangan penduduk mengenai masalah sebuah tasik di kawasan perumahan mereka yang didakwa mengeluarkan bau memualkan.

Dalam laporan tersebut penduduk merayu agar Majlis Perbandaran Kajang (MPKJ) membantu menyelesaikan masalah yang dihadapi



MD. YUSOF ISMAIL



ZAINAL ABDIN OTHMAN



MD. Yusof Ismail (kiri) melihat keadaan tasik berhampiran kawasan perumahan mereka di Taman Tasik Bangi 3, Seksyen 3, Bandar Baru Bangi, Selangor yang didakwa masih kotor dan mengeluarkan bau memualkan. - UTUSAN/AIZZUL A.MAJID

mereka sejak enam tahun lalu.

Namun dalam maklum balas MPKJ yang disiarkan pada 12 September lalu, pihaknya menafikan kolam takungan tersebut di bawah pengawasannya, sebaliknya di bawah Perbadanan Kemajuan Negeri Selangor (PKNS).

Bagaimanapun dalam maklum balas PKNS pula kepada *Utusan Ma-*

laysia yang disiarkan pada 14 September lalu, pihak PKNS pula menafikan perkara itu.

Seorang penduduk, **Md. Yusof Ismail**, 56, berkata, mereka akan memanjangkan isu ini kepada Ahli Dewan Undangan Negeri (ADUN) Bangi, Mohd. Shafie Ngah dalam tempoh terdekat bagi menyelesaikan

masalah berkenaan.

"Sampai bila harus kami menunggu? Tidak kira pihak mana yang bertanggungjawab terhadap kolam ini, pihak terbabit perlu segera tampil ke hadapan dalam usaha membersihkan kolam tadahan hujan ini demi kesejahteraan penduduk setempat," katanya.

Jirannya, **Zainal Abidin Othman**, 52, pula mencadangkan selain kerja-kerja pembersihan dan membaiki pulih keadaan kolam takungan itu, pemasangan pagar perlu dilaksanakan demi keselamatan pengunjung khususnya kanak-kanak.

"Setiap petang kolam ini akan dipenuhi oleh penduduk sekitar untuk menjalankan aktiviti riadah seperti senaman, berjoging dan berbasikal.

"Kami juga bimbang dengan keselamatan kanak-kanak yang dikhawatiri terjatuh ke dalam kolam terbabit ketika bermain," jelasnya.

Turut melahirkan kebimbangan ialah **Siti Robiah Ahmad**, 53,

Katanya, dia tidak menolak kemungkinan kes melibatkan wabak denggi hingga membawa kepada dua kematian di kawasan perumahan di situ berpunca daripada kolam takungan itu.

"Kami bimbang jika masalah kolam takungan itu tidak diselesaikan, keselamatan dan kesihatan penduduk sekitar terus terancam," ujarnya.

Sementara itu, tinjauan *Utusan Malaysia* ke lokasi terbabit hari ini mendapati, keadaan kolam takungan itu masih dipenuhi sampah yang terdiri daripada sisa makanan, botol plastik, dan sebagainya.

Selain itu, kolam yang berkeluasan kira-kira satu hektar itu berwarna hitam, keruh, dipenuhi sisa minyak selain menjadi habitat pembiakan nyamuk termasuk haiwan liar seperti biawak dan ular.



Penduduk Taman Tasik Bangi 3 gesa MPKJ cari cara penyelesaian
'Tasik kami berbau busuk'

PKNS nafi berkaitan kolam di Taman Tasik Bangi

BEBERAPA keratan Utusan Malaysia mengenai Taman Tasik Bangi.



KEADAAN sampah sarap yang berteraburan di permukaan tasik terus membimbangkan penduduk Taman Tasik Bangi 3, Seksyen 3, Bandar Baru Bangi, Selangor.

